

四庫全書

史部

欽定四庫全書

閩中理學淵源考卷六十八

廣平府知府李清馥撰

長史李木齋先生家世學派

李氏源曰成化之盛有節概文章曰木齋李先生精  
華煒煒摩盪雲霄比郡諸生多歸之如山之岱焉蓋  
先生熟復六經性理諸書又為虛齋先生所獎許其  
淵源之正可想矣再按先生家學遞傳皆能善承不

陸叔元先生嘗言曰閩理學濬發自蔡文莊而紫峰  
陳先生翼之叔元竊聞於家嚴曰吾祖木齋於文莊  
友也紫峰師也木齋以史官在告紫峰稟學焉時年  
二十矣文莊以銓曹在告紫峰稟學焉時年二十五  
矣前輩不立講學門戶而淵源師友非偶然也紫峰  
贈文莊詩則諷以孤舟野渡贈木齋詩則期以黃花  
秋色而兩先生出處大節若合符然前輩師弟子相  
與氣味何如也小子謹識之再按叔元先生謂青陽

祭於社者五先生木齋維徵二公及夏仲蔡于省  
莊方塘餘不乏通顯瞠乎後矣又按李氏先世自元  
季由府城東改築青陽至公數世矣公以易為泉南  
推重而陳氏琛為其高弟迨後姪孫逢期又以易授  
之蘇氏紫溪至元孫叔元昆仲踵起而叔元鹿巢氏  
論著諸先正尤多所發明至孫儕並彬彬文學以科  
名顯其所從來者遠矣吾郡共稱典型舊獻不亦宜  
乎

長史李木齋先生聰

李聰字敏德別號木齋晉江人器宇巖巖意遠語核雖燕處不聞俚語情容焉平生恥言人過有蹈諸道者輒首肯之又從而揚之讀易之外詩書大小戴胡傳綱目性理諸書甚習微醺景靜琅然楚騷數章時步其體跌宕淒切聞言官抗疏不屈輒中宵起舞凌寒賦詩所著有易經外義發凡別要鑑斷若干篇友人蔡虛齋手標之曰大眼目也虛齋嘗以精敏之識信謹之行堅苦正

大之志推之領鄉薦尋肄國子業丘文莊濬為大司成  
曰可秀才世史正綱初落藁遂手授之登弘治三年進  
士賜禮部宴主司楊守陟特名而賀曰場屋中如公是  
有數文章賜歸省授翰林檢討備雍王府書堂尋出府  
拜長史丁外艱畢改吉府前後啓王以講學法祖進賢  
遠佞既以母老乞歸章凡七上正德初劉瑾搜尋家居  
違限率罷之聰亦在罷中尋有詔起用竟不起鄉人稱  
曰古李先生孫逢祥曾孫芳元孫伯元叔元從孫逢期

文學李翠臺先生芳

李芳字孟收號翠臺晉江青陽人木齋先生曾孫少從世父晉峰逢期為潛心躬行之學其治經史有摘要手抄字結撰必端音叶律比旁及詩騷補弟子員所師事則蔡東洛所長事則留朋山王堦齋莊方塘林象川張月洲諸公皆一時鉅人長者無不器重之偃蹇青衿二十餘載志逾壯自標署逾高為詩若文結語務益峻諸子次第受經舉所手錄付之誨教如所受世父時曰伯

而其紹明先人易學仲可繼予尚書謂春秋聖人經世大業叔而穎可學也於是三子各占一經芳為人篤於根本大節而周旋造次必以度臆直履莊自舞勺時習於王父所則然長乃堅定之老而彌篤事王父母如父母送終追遠尤苾其心力切友于之誼於危難彌篤營構必先家廟產業先祭田首高祖父以及父各若干畝諸墳完葺一新凡三十年而一息弗忘雅負人倫鑒左司徒郭惟賢未遇時寔特甚芳器賞其文命伯子與友



金方氏卷六十八  
龔糜共之卒為世名卿與人交傾洞肺腑人有過輒面  
折不為隱然事已輒忘他如倡新文公祠疏決渠淤里  
人頌之嘗自題畫像云律身如口出口如肝三經教子  
遺後以安子伯元叔元晚以叔元主政刑部封如其官  
史文簡撰墓志

知州李端統先生伯元

李伯元字端統晉江人聰元孫萬厯戊子舉人歷官房  
真景三州皆以循良著績而在房抑採權中官不得擾

民在景飛蝗為災督捕必盡尤其卓卓可紀者居鄉允洽衆望歿祀鄉社著有青陽志

雍正間志

侍郎李鹿巢先生叔元

李叔元字端和號鹿巢晉江人木齋古先生元孫萬厯壬辰登進士第授刑部主事洗冤辨誣不輕動拷訊轉禮部儀曹建諸國本持議先冊立後冠婚疏凡二十上得俞旨又存心校正潢牒婚封典禮撰有南宮備考簡飭明要又撰鼎湖識周詳大喪服制時值分遣中使採

權關防持不鑄觸上意後鑄給封識牢密力奏不許沿途私折傳諭諸璫俱遵守地方賴以肅然又兩疏乞罷礦稅忤旨罰俸甲辰春在籍起山東按察司督學副使培植學校每以身心性命忠孝廉讓之學為勸誡雅意作養人才一時人士爭自濯磨文體還淳所取士稱得人焉丙午冬聞父病即乞致仕在途聞訃丙辰春起補浙江分守溫處道參議歷參政陞江西臬使端風俗黜奧援彰瘡明允遷湖廣左布政時滇蜀黔三省羽檄旁

午轉輸騷動楚中幾變叔元馳疏十三日至京得旨豁  
免派夫事乃定會直指興大獄羅織無辜叔元曰納溝  
恥若已推從井智窮救人遂毅然力爭掛冠歸崇禎初  
起為光祿寺卿管太僕少卿事已已赴補奉旨禮部議  
諡禮部咨訪叔元惟表章正學疏舉實才為公論砥柱  
旋以方正不合賜閒住歸里叔元歷任四朝授職無瘵  
曠宦橐蕭然自登第後便以世道為已任在浙在楚積  
俸餘買學田優待儒生歸田後屏跡郡邑動履遵先正

生平簡略一切浮文不問時俗羔雁惟念族黨親朋置義粟百石賙卹貧乏又為里閭捍患興利清溝塘疏灌注鄉民戴德幼時從兄伯元習尚書又改習春秋後遂為海內麟經指南亦嘗從叔祖維徵先生說易平昔論學扶樹正論以紫陽為宗為明季鄉邦楷式所撰述皆有淵源卒年七十四後贈刑部侍郎所著有四書春秋傳藁雞肋刪三餘存萍踪萍根諸集子正培孫璜曾孫一鳴皆鄉薦其序紫峰年譜略曰叔元自稍知章句家

君授以陳氏淺說諸書且命之曰紫峰先生之學得於  
吾祖木齋公及蔡虛齋先生而仰溯乎紫陽是閩學正  
派也小子臆而問曰夫學天下萬世之學也奈何系以  
閩哉家君笑而不答稍長從學士大夫游見當世所稱  
理學者大率尸祝姚江土苴紫陽若對壘然夫六籍之  
訓要使人思而得之思之愈深則其得之也愈固故有  
由賜所不聞而閔冉聞之矣閔冉所不聞而顏曾聞之  
矣又有終日與回言而不筆於書者矣今不揣學力之

淺深不分根器之鈍利而概哆之以知天知性之學就使妙契畫前神游帝先總為翫弄光景而無益乎身心性情之實矧愈講而愈失其真哉淺說通典諸書具在繇其淺者而深思之繇其通者而潛思之乃知學士大夫果無以加於紫陽而周禮之果在魯也即系學以閩奚不可哉

教授李維徵先生逢期學派

按維徵為木齋先生之從孫其學以不欺為本以整

齊嚴肅為行出其門者亦皆英傑名儒一門窮經學古綽有先正風流其派別如紫溪文節諸公以淡泊刻勵相切劘文莊而後蘇李二公所以主持風教者不少考論先輩典型之懿者於今尤誦法不衰云

教授李維徵先生逢期

李逢期字維徵晉江人聰姪孫其學以不欺為標領以孝弟為粟帛整齊嚴肅為終日步趨門人蘇濬嘗持乾坤二卦質之逢期曰乾之學約之誠坤之學約之敬誠



無不敬敬即思誠乾道坤道一而已繇貢士授龍水訓導擢九江德化教諭寧波府教授以禮讓風士士胥化之轉鎮海衛學寧波人奔送百餘里數日不絕終吉藩紀善祀四明名宦所著有四書易經隨筆其從孫叔元撰易經隨筆初藁序云晉峰先生之於易學深矣門弟子得其傳者莫若君禹濬凡君禹所著書淺為兒說約為微言精為生生篇大抵推明師說也先生游宦在外叔元始生迨歸田而總角矣每見先生焚香兀坐手一

編雖寒暑不輟丙戌冬乃進叔元而談易自伏羲畫卦之源方圓圖之次序位置陰陽之消長進退人事之吉凶趨避一一口授之而虧盈益謙變盈流謙數語尤為猛省曰凡易所垂戒者不在衰而在盛小子識之爾最後呼問曰序卦雜卦孰有味乎叔元臆對曰雜卦乃天地自然之理序卦斷章取義其理似未圓全也先生喜形于色曰稚子可教矣先生之書名為隨筆其初卷帙頗漸晚乃刪舊藁更定先生卒君禹攜以入粵將梓之

屬君禹卒而此書失傳矣歲壬子督學馮公索遺書乃  
遍搜蠹麓及諸弟子所記者伯兄手輯之而叔元稍加  
詮定凡丙戌冬所口授者書中或載或不載即君禹行  
狀所稱濬持乾坤二卦質先生數語而今皆不載也則  
此書已不盡先生矣況足以盡易乎因僭題曰隨筆初

藁云

萬歷志

閩書

鹿巢集

處士李集山先生逢祥學派

按集山為古先生文孫亦一時師席模楷表一昆仲

受其業焉今錄其高弟著于篇

處士李集山先生逢祥

李逢祥字仕熙別號集山古先生聰之孫終身力學不倦青衿教授里中戶外屨滿衷一兄弟其高弟也終日整衣冠危坐無嫖褻容諄諄誨人不倦明講解正句讀往往從洒掃應對間教人以精義妙道及隨行隅坐之節出告反面之儀終不令童子速成晚年就北城隈棲安一室安貧樂道不涅不緇等世態於浮雲優游以老

及門之士相與尊曰集山先生

李衷一撰墓志

副郎李心符先生光綬

李光綬字宗英別號心符少受易於父奉直公貞從兄  
光縉幼孤貞撫而教之如已出自勝衣舞象以至成人  
二子無日不相朝夕光縉資性敏而光綬則倍苦篤貞  
循循施誨各竭其方業成諸執經問業如呂天池納言  
李我明郡伯咸出其門壬午補弟子員乙酉鄉薦越辛  
丑前後凡六上公車皆不遇二親年益高迺就銓補長

垣邑諭三載以御史疏薦擢國子學正遂晉禮部司務  
歷戶部員外郎卒於官光綬性廓落與人交傾洞肺腑  
然不能奔走周容自筮仕以至曹郎清節介操囊無一  
絲之積焉

史文簡撰墓志

林蒲石先生忠兄弟學派

按蒲石先生為紫溪蘇公受業師也清隱高懷一時  
及門殊多英彥故特錄焉

林從政先生忠

弟太

林忠字從政號蒲石弟太字從禮號見潮晉江人蘇氏  
濬撰本傳曰二公俱被服四子沉浸六籍不能俯仰世  
資逐射策之技則推其餘訓里中子里中子爭以為名  
師余兄弟卒業焉二公規規摹古最能抗小學之法第  
長公以訓詁勝每指類罕譬人蒙者心開次公以音律  
勝屬詞比偶往往有詩人意嘗自署云甕牖窺光大塊  
日高浮野馬衡門守拙清宵人靜樂梅花其幽雅疏越  
如此二公與人交披肝露懷不作脂澤語而風神峻潔

不可溷以私家君子尤嚴重之每公暇輒造語移夕出  
斗酒相勞嘲風弄月時誦經籍詩詞以佐諧笑至談及  
時事刺刺然諤諤然微言隱諷家君子未嘗不開顏受  
也

西山林氏家世學派

按何鏡山先生撰林氏三世存歿篤行傳諄諄獎善  
誠足以勸世勵俗其家學自秋江公肇端啓迪戶部  
方伯世為廉吏三公皆祀於學宮之賢祠淵源信有



本矣茲著其家世載于篇以何公所撰諸傳節略附之備考焉

明經林秋江先生堯

林堯號秋江晉江貢士與李木齋聽論易有得去之三山從鄧煥講禮記盡得蘊奧以授泉士發為箴砭言皆藥石布衣襦整澣垂敝辟積如新同堂子姓人人垂白皆愛德不情所與游盡正直可欽之士遇田夫野叟亦端拱酬對嚴毅方正以不仕終子性之見林龍峰學

派孫一新見陳南樓學派皆慈祥敦謹世為廉吏孫  
尚新曾孫可宗豫宗元孫茂先學行俱可紀

閩書  
何司徒

集

郎中林六川先生性之

林性之字帥吾晉江人嘉靖八年進士授麗水知縣麗  
水民俗樸淳而性之古心質行施于有政以哀矜聽獄  
訟以撫字理催科民信愛而謳頌之歷官戶部主事員  
外郎中過家卒性之少而精思篤學要於自得不以世

儒自期待仕宦十餘年清素澹約不異寒士家居惇睦  
割田十畝以給族人不能婚葬者其存心慈而待物恕  
以讓一毫非義之事不屑為亦不忍為為弟子員時以  
易著名所著有易經說中庸口義家傳而人誦之有所  
疑輒舉性之之說以證云按清源文獻黃偉序陳氏四  
書淺說謂論語下部為人所湊補偉取而校正之別取  
今戶部郎林六川論語下部說以足之命工梓以傳焉  
則公尚有論語說志乘皆未之及六川性之別號也子

一新 泉州郡志 清源文獻

方伯林象川先生一新

林一新字震起號象川晉江人性之子也性之未第時  
所交慎許可知南樓陳氏學有淵源使一新就學焉嘉  
靖丁未進士授戶部主事筦通州天津倉咸寧侯仇鸞  
提大兵拒北恃寵自尊重督餉郎官稍不如期多危中  
之一新戒諸分屬為期會走間道身趣之餉悉如期至  
竟不見咸寧返咸寧反亟稱之轉員外郎旋陞江西僉

事分宜相當事家僮犯法一新直杖繫之轉雲南參議  
東川土官為梗開府兵征之與直指相左一新獨右開  
府直指怒糾開府誣及一新事竟白坐降級家居七年  
起湖廣僉事累轉江西副使復以忤度撫論調後調雲  
南轉參政歷廉使進右布政皆滇蜀邊徼地丁內艱服  
除適江陵秉國其同年也素無通問至則逐隊晉謁不  
私詣江陵惡其遠已由是以年老被論罷歸家居蕭然  
守先世田廬饘粥幾不具蓋林氏世為清白吏子孫云

子可宗為諸生淹洽史書事一新最孝

舊郡志  
新郡志

閩書

文學林特起先生尚新

林尚新字特起篤志學問自號猛省子懷畏子兄一新仕在外常推父兄睦族之愛拊畜族人父舊有恤族義田田所不贍尚新別為區處凡衣食瑩葬及流徙失所者皆為籌畫至修葺祠廟身當其勞嘉靖之季寇警挈家避城而身守先人廬倡其鄉人築堡禦寇平生與人

處有終始自奉蔬食布衣而已嘗曰人生有姻戚之愛鄉隣之好朋友之交皆與吾身接也忽漫不親切是自輕其身弱冠隸文學諸生年未五十棄之郡太守聞之稱為茂才異等鄉大夫丁公自申文學長者也作誄誄之敘其孝友恭讓之行謂之曰君子子豫宗字和仲孝友敦摯念祖戶部之宦也先置族義田其後欲為秋江貢士公祭田力不逮貢士公竟無祭田於是別圖埭田海蕩充之終以田薄為歎後使其子茂先走真州請於

從兄八柳割俸以資之以竟其志子茂先亦有至性以  
父命請置貢士公祭田客死儀真父豫宗作文誄之何司  
徒撰三世篤行傳畧



閩中理學淵源考卷六十八

欽定四庫全書

閩中理學淵源考卷六十九

廣平府知府李清馥撰

嘉隆以後諸先生學派

余錄明代泉南派系自洪永成化以後約數十家其  
無師友可據者總列以待考訂外此遺錄者不少然  
此數十家者多正嘉以前守一先生之說者嘉隆以  
後大抵風氣一變多與程朱有違言者矣如遵嚴王

公與荆川雙江諸公切劘其學亦多良知之餘然其任心廢學之弊未甚紕繆也先公嘗曰宋元以來何王金許也二胡也

雲峯雙湖

蔡陳林也皆家承師授經學

一時也蔡陳林其寡過矣乎謂其規規於師說而不敢背也馥按姚江王氏之學盛行學者多趨簡便宗而和之惟閩掛弟子之錄者甚少隆萬以降風氣漸染其所趨異矣然其碩德雅望在吾郡如蘇紫溪黃文簡李文節王恭質何鏡山李衷一諸公亦尚先民

是程著言立說猶述舊規可知一代風氣自虛齋先生師弟講明倡起流風數十世未艾仁賢之遺教遠矣哉明史載閩中一代學術多宗虛齋之學其來固有漸矣乾隆戊寅三月望日

忠愍周蹟山先生天佐

周天佐字宇弼號蹟山晉江人嘉靖十四年進士奉旨賜歸娶家居菲衣糲食挾冊吟誦思通達當世務孜孜如不及於餘事漠如也戊戌拜戶部主事分督草場已

又督儲德州經理嚴密辛丑九廟災有詔諸臣條時政  
闕失初御史楊爵疏陳五事詔繫獄數月無敢言者佐  
謂此乃時政闕失之大因上疏曰求言之道示人以言  
不若示人以政陛下令諸司條奏闕失此特示人以言  
耳御史楊爵之獄未釋是未示人以政也夫國家置言  
官以言為職楊爵所犯在於過直情則可矜古者帝王  
求諫嘗立毀謗之木毀謗非事君之義矣然而帝王不  
諱者慮下無直言則上不聞過也漢至文帝時已治安

而賈誼方奮其痛哭流涕長太息之譚彼豈好為不祥哉天子之尊所少者不在唯諾稱頌之滿庭而在憂治危明之一士在庭諸臣不負此義者獨爵耳聖怒之下  
一則曰小人一則曰囚犯夫以盡言極諫為小人則為  
逢迎之君子不難也以抗疏納諫為囚犯又孰不為容  
悅寡過之臣哉言行君子所以動天地也人君一喜一  
怒上帝臨之陛下試一思焉其所以怒爵而罪之者果  
合天心否耶臣願察爵之言原爵之心亟從寬釋仍不

客採行旌其忠謹以勸來者如是而人心悅喜天道降  
康此求言弭災第一義也疏聞詔廷杖與楊爵同繫獄  
越三日斃獄中隆慶紀元贈光祿寺少卿廕一子入監  
讀書按先生送林次崖知欽州序曰嘉靖歲乙未大理  
寺丞林次崖公以論遼東事觸忌諱謫欽州時吾泉士  
大夫秩於官者惟次崖為尊及其出也或相與語曰吾  
泉其衰乎列卿獨一次崖茲且不能容於朝矣予歎曰  
不然也夫人才盛衰誠不於其秩之崇卑與其分之疏

與戚也吾泉仕者與朝廷疎遠天子寵光所不及天下  
之所知也至其為國家忠謀不為爵祿牽繫而直言以  
報天子乃於泉得一人焉亦天下之所知也且予聞次  
崖公奏議方上雖中官輩有願一見而相語者曰不識  
林公何狀夫人如中官且知慕次崖則天下之仰慕次  
崖公者當何如耶然則泉其盛乎或默而退予乃戒從  
策馬造次崖公之廬而謁焉公適檢點行裝古書浩瀚  
一見而戲予曰書其能誤人耶予曰不然惟次崖能多



讀古書故能為今日事次崖公其不負於書書其不誤  
次崖矣公欣然而笑乃告予以必去之意曰平生所學  
為何使今而默默居棘寺指日可得大中丞吾本心幾  
壞盡矣予不肖方由秀才被舉到都下居數月見士風  
與時勢相趨波蕩風靡鮮有存其初志者則嘗竊歎曰  
今世之官皆壞人心術之具也不如吾秀才輩其好惡  
與人相近也者幾希予聞次崖公言甚喜次崖公能不  
以官害其心也古所謂國有道不變塞焉強哉矯次崖

公其人也歟公卜日啓行祖道郊門者皆賢公卿大夫  
名士行色甚壯予亦蒙恩賜歸娶方與公同歸是歸也  
即欲効次崖公之多讀古書他日即欲効次崖公之敢  
為直言不壞本心茲予志也并述以請教次崖公非敢  
言贈也惟公以為何如

舊郡志

清源文獻

按察王堦齋先生春復

王春復字學樂號堦齋晉江人嘉靖十七年進士初令  
泰和有惠政歷南工戶二部郎中出守贛州會有大木

之役賴當上游春復條上數事視他府費為省閩流賊  
覘督木官積貲鼓行出石城越會昌寢迫雩都執二指  
揮以逞春復提兵出郭去四十里民皆來集賊聞春復  
出不敢前釋二指揮遁去賴下流諸郡率保無事擢雲  
南按察副使駐劄永昌慎固關梁禁民無私入于崖隴  
川南甸三夷地牟利激怨民夷並安擢廣西布政參政  
駐劄賓州出繫囚編保甲立撞市期民方賴為安春復  
遽寢疾迨貴州按察使報至則不起矣春復持重老成

言如不出口臨事設議則侃侃辟晝為治持大體不屑屑簿書期會留心教化素不立道學之名遇有講者與剖析微義開關啓鑰聞者誦之今泰和時曾質學於羅整菴歐陽南野二公所著有四書周易疑畧自序曰儒者誦法孔門質聖道為依歸而言人人殊莫得一也夫子之門聰明莫若子貢篤實莫若子夏子貢則以多聞見為高子夏則以篤志力行為實而皆不若顏曾獨得其宗夫其親受業於聖人所見若

斯殊也道者著於所感學者止於所知故雖多聞篤行而莫見其多聞篤行之迹焉此顏之所謂愚曾之所謂魯也至一之機見乎感故不待於牽合戒懼之要止於內故未嘗見其在外也按丁氏三陵藁云堦齋先生之為是書也折衷朱說而反覆義理之所安不敢於背朱未嘗徇人之所同信不必於異朱未嘗諱已之所獨得益更數載而後就藁翻數藁而始成書云

閩書

萬厯志

丁氏三陵藁疑畧序

布政薛君恪先生天華

薛天華字君恪晉江人嘉靖二十九年進士以南刑部  
郎考滿入京會楊忠愍繼盛以論劾嚴嵩死天華招同  
志楊豫孫董傳策與漳浦朱天球往哭甚哀治具如禮  
一時有四君子之稱竟以此取懟七年餘始出為重慶  
守重慶當彫瘵後民多流移為申請蠲稅安集之擢雲  
南提學副使晉浙江參政廣東按察使隆慶戊辰舉卓  
異晉本省右布政使卒天華講學勵行所治經術務究

大原讀大學獨信孔穎達古本讀易玩先天諸圖讀春秋四傳常以己意推尋當日事即合註疏與否弗論也居官所至以清白稱其文學歐曾有居鄉左戒守官右箴尤為學者所誦其左戒之詞曰毋通要路書以務養節則俯仰不瀆毋預塵紛事以務養寂則外內不擾毋循末俗態以務養高則志行不羞毋受非禮餽以務養廉則彼己不失毋妄結賓從以務養交則戚黨不棄而善彙集毋苟出言語以務養德則靜躁不爽而口過息

毋逐戀嗜好以務養神則天倪不伐而和氣全毋厭薄  
遲鈍以務養重則機心不熾而真性得毋譏訕世短以  
務養福則不忤人以見直而鬼責消毋虛邀時譽以務  
養誠則不怨己以見賢而潛德進毋妬嫉雋能以務養  
才則不設阱以誣善而有獎藉之功毋歆羨汰靡以務  
養嗇則不競侈以蠹俗而有由禮之漸其右箴之詞曰  
遇暴上思以禮事之則不可辱臨頑民思以仁悟之則  
不為仇御羣小思以嚴遠之則不啟侮統列屬思以正



率之則不傷威察友有過思隱規而公掩之則忠不失  
厚庶民有議思靜修而密弭之則微不悛惡受纖介之  
私思以欺君為懼則勤公愈至叨一命之祿思以報主  
為心則舉職益謹怨者人所易怵思精白以任之則廷  
有分謗之士難者人所易避思委質以殉之則朝有仗  
義之臣即有偏喜思畏天以奉之則無溢實之賞如有  
暴怒思觀理以忘之則無淫法之罰子應鍾令桂平有

惠政

閩書

萬厯志

主政李東明先生春芳

李春芳字實夫號東明同安人嘉靖二十九年進士性警敏年十二食餽十六領鄉薦聞羅達夫倡教師事之居官清苦初試戶部奉命擣大同軍故事凡遇部使至輒具豐儀為餽春芳一無所持而去授刑部主事執法不阿卹理江西有懷金至者春芳正色拒之守潮省訟牒蠲贖錢適有倭患軍務旁午春芳峙糗糧繕器械募敢死士激以大義明紀律冒矢石潮得無恙至今祀之

以母喪歸著白鶴遺集與郡弟子論道講學年四十二

卒同安縣志

少參尤思所先生烈

尤烈字子偉號思所晉江人嘉靖二十九年進士初授  
祁門令治尚純約耿介自持擢南京都察院經歷晉戶  
曹員外尋郎禮曹出為江西僉事連遭喪服除仍補江  
西居頃之自投傳歸起雲南參議竟辭不出烈居官廉  
歸益貧甚然性甘淡薄不問田宅飄飄鶴菴棲遲巖岫

間最後寄傲東禪龕牆蒿牀糲餐裂縷人為不堪初亦有病其矯者久知其廉立始終不渝當道守令高其風多枉騶過之初烈令初門時有遺愛民為立祠後不當祠者去輒遭毀惟尤公祠久尚存云所著有三時私識萬厯志 雍正間志 溫陵藝文

參政李序齋先生熙

李熙字穠之號序齋晉江人隆慶二年進士選翰林庶吉士丁外艱服除授兵科給事中上疏乞錄世廟時言

事諸臣請蔡虛齋清從祀孔廟糾中官馮保巨奸當斥  
逐旁及戎政互市振卹阜財諸疏皆有建白世廟升遐  
高新鄭相欲令臺省掊擊諸閹盡逐先朝舊時左右同  
列有受新鄭指者以語熙熙不可已新鄭竟去相幾陷  
不測同列始服新鄭去則江陵居正代之偵熙與新鄭  
忤諷為排不附已者熙復不應久之疏論譚司馬沐黔  
國劉都護不法事司馬張私人也為所擠謫南豐丞怡  
然就道既至直指檄脩江右通志棲白鹿洞召諸青衿

與談論名理一時士子彬彬向風焉量移寧國令擢南  
刑部主事出守高州擢廣西備兵副使所至詢民疾苦  
剖斷疑獄壽畫戎務風化肅然遂引疾致仕道陞雲南  
參政舟次惠州卒熙孝友道義有古人風一落清華棲  
遲海服為政以恩信蒞人精勤任事每言士大夫立身  
行已為要至於窮通得喪益有命焉所著有私警錄八  
戒及詩文藏于家

閩書

恭質王麟泉先生用汲

王用汲字明受號麟泉晉江人隆慶二年進士授淮安推官陞常德同知萬厯丁丑入為戶部員外郎時江陵張相奪情柄國假歸治葬楚中督撫藩臬千里外奔赴獨巡按御史趙應元稱疾不會馳疏乞休長臺者希張相旨以飾疾規避劾罷之用汲發憤上疏大畧謂御史用不會葬忤柄臣而御史大夫阿意借事糾彈竊恐憑社煬竈之奸復見今日謂宜別白忠邪永戒朋比疏入默為民於是直聲大震癸未張相沒專恣狀露得重譴

用汲自田中拜刑部員外郎尋遷廣東按察僉事遷尚  
寶卿大理少卿不二歲躋九列所至一意孤行絕不與  
時上下如爭王文成學術偏詖不稱廡祀都御史胡某  
銜諸生吳仕期書詆江陵奪情嗾屬吏捕斃之宜正辟  
不止謫戍皆與時議異同疏雖不行朝議凜焉丙戌晉  
順天府尹丁亥晉南京副都御史總督操江會剿太湖  
劇盜殲其魁捷聞賜金幣己丑晉南京兵部侍郎改吏  
部商丘宋太宰某推轂天下賢士大夫多所咨詢辛卯



晉尚書南刑部以脾疾乞歸用汲鯁直廉介本於天性  
為諸生時郡困島夷客兵飽餽餉不發一矢即陳書直  
指言狀郡守嗔以非書生事輒抗聲曰范希文做秀才  
時便以天下為己任矧鄉井事耶佐淮安常德二郡囊  
無長物當削籍時僑居郡中鵲衣藜食教授生徒自給  
及致尚書事歸疏布無改卒年六十六贈太子少保諡

恭質

舊郡志

太僕王尹卿先生任重

王任重字尹卿晉江人隆慶二年進士授廣州推官州  
守與舶司交構事連任重竟不自明陞柳州同知久之  
事白擢守其府持法方嚴豪家忌之調貴陽以馳傳左  
遷維揚同知年餘遷雲南曲靖守按察副使移陝西行  
太僕寺卿復遷雲南參政山東按察使專董漕儲事竣  
遷雲南右布政使以疾乞歸予太僕寺卿致仕任重自  
幼慤淳淳沉邊徼悉心官理滇中先後削平逆酋任重  
勸為多為諸生時慨然欲紹濂洛關閩之學常粘太

極圖西銘于座壁及守曲靖值江右李中丞材分憲金  
騰遂以學往復相質顧任重功專實踐非第於唇吻尋  
求也持身重循禮法終日正襟危坐誡子孫以孝弟勤  
儉夜將就枕必誦孝經小學二章雖耄不輟曰惟義理  
可願性詩書可陶情年七十八卒任重與王恭質俱南  
鄉人為書生出入相隨其質行又相類里人並稱焉

舊郡

志 新郡志 閩書

按察張洞齋先生治具

張治具字明遇號洞齋晉江人隆慶五年進士授永  
淳令即詢民瘼為豁浮賦三百石有賈人子賂當道  
請鑿鑛爭之不得設重稅困之立報罷移臨海作追  
徵全法考民稱便擢為御史巡視倉庫兼河道持重  
舉大體事事治辦丁內艱服闋赴補扈從神宗謁陵  
還過老子宮具疏請罷逸遊以光盛典上嘉納之命  
按南畿復按湖廣旌廉汰貪鋤豪強慎聽訟在臺十  
一載三按大都所至皆有建監轉江西副使遷參政

陞四川按察使播州民苦楊酋殘暴避入內地時議  
驅之治具謂播人即吾人方離棄而復納之非情為  
設法安戢會江西巡撫追訾計吏事請量移不赴調  
歸卒治具篤行長者外坦中嚴於倫情甚厚嘗自言  
平生所為惟此念不欺人咸信之以為慥慥君子所  
著有尚書會解四書初說諸儒辨旨初東集等書葉  
文忠銘其墓李東一撰行狀云公嘗謂平生惟好賢  
一念不能自己解組歸或坐竟日語移時無疾言遽

色非禮義不以道非國家事不以及終日無褻嫺之

容一動一止光緡目擊之而道存云子國裳己卯鄉

薦

萬厯志  
霞草

雍正問志

李氏景璧集

葉相國蒼

### 長史李南麓先生文纘

李文纘別字南麓南安人嘉靖辛酉鄉薦銓易州知  
州陞常德府同知轉岷府長史林下餘三十載壽八  
十餘稽古博文期以羽翼經傳下至星卜律厯亦所  
窮究篝燈讀誦至老不衰所著有易解禮記庭說書

經大指四書口授旁及子史算法律厯凡若干卷又  
嘗定冠婚喪祭諸禮而鄉飲儀節參考尤詳邑人士  
多就之學閩書 南安邑志

文學王次山先生宗澄

王宗澄字志濂晉江人為郡學生天性孝友操履純固  
動有矩度言恥及利與兄宗源宗濬俱以學行重當時  
著易經兒說為世指南一時名德如蘇氏濬黃氏一龍  
張氏冕並游其門

按公有易經兒說門人蘇紫溪亦有  
易經兒說豈師弟相授不嫌其同耶

闕疑待考 張氏冕撰墓誌  
王氏恥躬堂先世乞言

同知黃昭卿先生潛

黃潛字昭卿晉江人父泰令武康潛為諸生時以學廩  
讓兄當起貢辭同廩者貼貢資同學高其誼讀書太學  
授嵩明州同知會州守缺潛署州篆易土城為石可捍  
卻夷酋徙學宮以興文事壩普沙河於張家山時其蓄  
洩潤溉田疇州人永利之潛在州二載盡心民事次第  
舉行多此類州人相與祠之潛刻厲書史題讀書處曰



靜養一心之神動觀萬物之變又有四難四要箴以自  
警四難曰急躁之心難攝麤浮之心難馭誇大之言難  
收匆遽之事難理其四要曰心要寬綽氣要和平易要  
簡寡事要尋思平昔言動取與影衮不愧學者宗之孫  
國鼎 閩書 舊郡志

通判洪鳳明先生受

洪受字鳳明同安人潛心力學於經傳多所發明在庠  
教授稱大師所著有易經從正錄滄海紀十卷嘉靖乙

丑以貢歷國子助教夔州通判卒于官

縣志

閩書

行人孫先生振宗

孫振宗晉江人嘉靖四十一年進士仕行人卒深於易

有易學說約行世

閩書

周命申先生祐

周祐字命申同安人學問該博隱居教授傳易說於漳

郡漳之易學至今宗之

閩書

李先生如玉

李如王同安人纂集周禮會註十五卷嘉靖八年令其子詣闕進詔嘉之如玉究心禮書有司以禮獎勸給冠帶榮之閩書

蘇通宏先生鼎實

蘇鼎實字通宏晉江人性警悟絕意仕進究心伊洛之學著尚書明說四書註補性理約言人物傳評古今鑒畧閩書

黃參陵先生道煥

黃文煥後改道煥字孔成號參陵生平博極羣書為文不落時蹊教子嚴肅著有尚書遺籙集解雍正間郡志

文學劉廷純先生錄

劉錄字廷純惠安人為文學諸生纂述疏義教授生徒所著有學庸口義詩經直解讀詩記至易書春秋大小戴諸篇各為輯畧孝事父母宗戚鄉里處之得宜人稱型範

閩書

閩中理學淵源考卷六十九

欽定四庫全書

閩中理學淵源考卷七十

廣平府知府李清馥撰

按察蘇紫溪先生濬學派

吾郡自蔡文莊陳紫峰而後崇獎後學開發經旨者  
必推先生其韋編微言難鳴偶記前輩謂可與虛齋  
密箴並傳信不誣也其解易生生篇諸解自謂補程  
朱蔡陳之遺善乎文節李公之言曰先生學宗虛齋

節倅紫峰其出處相類其講解足相發明云再按先生自述先世之著於泉者自宋司空忠勇公緘始其後或居清溝或徙龜湖又徙郡郭具在家乘又敘留耕公自宋鼎革後長懷高隱子隱德公砥行匿名大致相類焉

按察蘇紫溪先生濬

蘇濬字君禹晉江人宋忠勇緘之後萬厯元年鄉試時大司馬郭子章為建州司理與試事夢蔡虛齋出其門

既得濬卷大奇之薦為第一五年成進士會榜制舉之  
文出經入史大變衰繭之習海內翕然宗之授南刑部  
主事丁外艱服除補工部江陵相張居正有疾九列為  
祝釐部尚書以青詞命濬濬不屬也癸未禮闈分校得  
士為多會元李文節廷機其最著者尋改禮部出為浙  
江提學僉事開門試士士卷未竟濬閱已遍水鑑獨操  
剗除常調士始怪駭久益信服遷陝西參議領商洛道  
衙齋無事與秦士談經講藝時屏騶從行邨落或登臨



山水悠然自適父老具園蔬斗酒來餉濬酹而嚼之若  
親父兄秦中苦役白兩臺用條鞭法民困以蘇商洛有  
礦盜數百列柵拒守移檄諭之皆解去遷廣西按察副  
使備兵蒼梧尋轉參政領桂林道政尚簡易興文化俗  
岑溪搖變起廢將陳遴以吳廣為先鋒身自督戰平之  
擢貴州按察使辭病歸有彊留者曰用世如虛舟存而  
不繫過而不留不以天下為已有出世如游魚游乎江  
湖忘乎江湖不以己為天下有亡何卒門人文節李公

廷機曰君子之道始於淡而不厭淡則欲寡外不足而  
內乃有餘余嘗持是以觀世之士大夫賢者必淡未有  
爽者而於吾鄉得紫溪先生先生才高而學博科巍而  
名章環海之人讀先生制舉之文與所為兒說生生篇  
諸書莫不知有紫溪先生者先生泊然介然視世之腆  
膴紛華一切不以入其靈府故其視學兩浙惟知興古  
學樹真才盡謝諸干請即有謠詠之者不顧也其副粵  
憲參粵藩時有門下士為政先生移書語某寄語之第

曰某賢未遷某賢未起語不及私也其致政也銓部更推擇為貴州觀察先生益堅臥不起蓋先是黃州耿公嘗對某談先生某曰先生忠信孝友仕不擇官不擇地家不求田不問舍是其為人耳吾郡有虛齋紫峰二先生祠皆特祀至先生而三先生學宗虛齋節倅紫峰其進退相類其講解足相發明而其文詞風雅抑亦軼而上之乃其味之淡一也當斯世頽靡而祀先生以婉紹前脩激勵後死維持風教砥柱波流所關鉅矣所著四

書解醒易冥冥篇在粵脩廣西通志三餘集等書又有  
雞鳴偶記則躬行心得之言讀者謂與虛齋密箴相表  
裏學者稱紫溪先生按近代先生所傳書有易經兒說  
生主篇韋編微言四書兒說著解  
醒篇雞鳴偶記綱鑑紀要三餘集  
等書閩書 舊郡志 新郡志

按察王當世先生道顯

王道顯字當世同安人從蘇紫溪濬游遂於易萬歷十  
一年進士任台州司理憲囚多平反署台州府及天台  
黃巖太平三邑所到常例盡却之擢御史疏核兵部尚

書王鶚失兵備請以王遶代出為青州僉事設法擒治  
響馬賊甚多遷雲南參議丁內艱服闋補浙東兵備整  
肅衛伍倭不敢犯陞湖廣按察使尋歸杜門著書卒

舊郡志

少司寇蔡體國先生獻臣

蔡獻臣字體國同安人萬厯十七年進士授刑曹時上  
久不眎朝獻臣抗疏定國儲忠愛懇切言人所不敢言  
凡所讞理一歸明允司寇王元美歎為用世才調主職

方推補將弁惟才遷主客郎四方朝貢一依典制再調儀司郎冬至習儀臺省爭班獻臣力執舊典後為楚藩假子一案忤右宗伯意宗伯遽罷深憾獻臣已又疏請福藩之國鄭貴妃恚甚夜令內使執之聞者震慄獻臣不稍屈及旦以舊典爭於上前上深嘉其直遣出轉參政旋知湖廣按察使有為宗伯脩憾者偕楚事劾獻臣罷歸百姓遮留獻臣歸讀書東山脩邑乘尋起浙江寧海道陞浙省督學擢光祿少卿所著有清白堂稿仕學潛

學講義筆記等稿行世年七十九卒贈少司寇按獻臣  
為紫溪先生門徒其撰紫溪易經生生篇序曰蘇君禹  
先生以義經冠鄉書魁海內既行其兒說為經生嚆矢  
矣然兒說猶帖括家言耳先生藩臬粵西時冥思韋編  
時發其所獨得至再三削牘名冥冥更名生生即先生  
亦自謂挾義文周孔之秘而補程朱蔡陳之遺在茲篇  
矣獻臣初受是經已去而受詩然自角巾即承下風不  
意其終茫然也今讀茲篇始覺了了如象非潛龍見龍

之謂變非損來既濟來之謂係則勿用亦詞占則潛龍  
亦占斯言也使考亭復生亦必首肯云

同安邑志 蔡  
體國撰生生篇

序

省元李衷一先生光縉學派

按衷一先生師事蘇紫溪又與黃文簡何鏡山諸公  
交好同時誘掖後進其持論一以紫陽為宗時良知  
之說朋興先生於文莊紫峰紫溪屢述淵源以闡明  
師旨於不墜亦一時師表云



省元李衷一先生光縉

李光縉字宗謙號衷一晉江人父仁舉光縉四歲而見背稍長受業外傳寓目輒誦舉筆成章為諸生厭薄舉子業閱覽博物為古文辭師事蘇紫溪先生濬每嘉歎異日必為閩大儒萬厯十三年鄉薦第一偕計後不問家人生產不溷有司日研經史及朝章民隱以備經濟尤喜敘述節烈忠義事其文章悉嘔心而出不輕下一語又痛士之為制藝者竄入二氏擯棄紫陽為文設文

則以示之的家居及北上時就正者盈函席歸益潛心  
大業著書授徒以終學者稱袁一先生所著有易經潛  
解四書要旨

新志作  
臆說

中庸臆說及景璧集二十餘卷平

生行實詳所作獨照醒言中卒年七十五卒之前十日  
為銘授其子曰文之不用道之不行不處不去總以成  
仁京山李氏維楨撰墓志

新郡志

道南原委

### 參政林璞所先生一柱

林一柱字廷郢號璞所同安人啓五代孫萬厯三十八

年進士授揚州司理歷署三篆分校南闈天啟五年御史卓邁薦擢御史疏奏切直請臨朝振紀綱歷陳賣士餉卒名存實亡之弊雪幽忠明功罪至有世運當阨舉國若狂之句留都東宮火請復建文廟號劾織造監李實制官虐民必亂天下閹黨側目因請告例轉廣東參政拂袖歸隱東山以仁孝稱為李衷一先生門人曾序衷一易經潛解云同安邑志

縣令蘇子介先生懋祉

蘇懋祉字子介晉江人萬歷三十五年進士由南召令  
移寧陵丁內艱服除補歙縣卒于官囊橐蕭然無忝清  
白鄭三俊督福建檄祀懋祉于學宮懋祺亦篤于學問  
何鏡山撰本傳 李衷一撰墓志 閔書

陳千仂先生

陳閔

字千仂三山人按聊城鄧秉恒撰三山陳氏夢

壁蔬園小牘序云陳子尊甫千仂先生為李衷一先生  
高弟淵源澄邃云餘名字事實未詳待考增入再按夢

壁曾為莆陽教職著有全史比事

文學梁吸泉先生朝挺

梁朝挺字吸泉安溪人廩生受業李衷一先生之門博涉經史讀書求奧義晚益大進襟懷灑脫有所觸輒形諸歌咏間著有剪江靈應集

安溪邑志

縣令蘇阜山先生希棻學派

余乾隆乙亥秋九月到郡從山人徐簡之家借觀鹿巢李氏叔元集得鹿巢撰蘇阜山先生本傳并賓席

詞言因撮其畧為敘其學派焉按鹿巢為阜山之甥  
在明季派別不雜他歧以紫陽為宗閱集中表章諸  
先正緒言甚悉今考之南安邑志謂前壬申志竟遺  
阜山之傳即族黨鄉閭亦不得聞其詳後得之故老  
私傳為增其傳云夫晉南耳目之近阜山又耄年碩  
德為時望人鹿巢之集亦流布當時而其鄉其族尚  
搜羅缺遺如此則深山崇邑湮沒不傳者多矣非賴  
有道能文發潛表述焉得信而有徵哉茲撮其本傳

大畧并附賓席文于後

縣令蘇阜山先生希棧

蘇希棧字于欽號阜山南安人初試有司督學朱衡拔  
首泉士所登答子書策有老宿未經見聞者萬厯二年  
成進士上公車朱督學時為大司空御史大夫葛端肅  
皆遣子受業希棧雅明經術先是以諸生設帳蔣氏時  
馨從于漳平楊氏道賓從于紫雲後所造皆聞人也初  
仕許昌甫數月清節大著會直指按部繩以拜跪之節

遂拂衣歸時年四十五後田居之年恰如之歸田後與  
里中黃文簡詹司寇諸耆英結社賦詩老年治菟裘阜  
陽山之阿遂斷城市而專山林脩族譜清理義倉建始  
祖祠宇墓寮葺治梅隴阡履濡橋此為政于宗者脩霞  
舒里社築月半泮水壩溉田五十頃栽植苦叢以障曲  
溪水惠重新雪峰寺名勝築太湖民堡以豫不虞此為  
政于鄉者凡所心畫制樸而詳費鉅而省興利除害而  
可久至兒曹則土室衡門八口不能三鬴食平生克耐



堅苦老眼昏花而對書瞭然自著管斑存質註莊子註  
離騷諸書又選詩集解杜詩選註二部尤時所傳誦其  
根本則在族譜義倉設圖立格條理整然嘗手簡子姪  
曰凡幹公事如已事則事無不濟惜公錢如已錢則費  
無不省吾半生任勞任怨惟仰不愧祖俯不愧心而已  
爾曹慎之卒年九十

附李氏叔元撰賓席文曰先生誠心為質直道而行風抱時名濟南

葛端肅曾遣子受業雅明經術宗伯楊文恪曾執贄及門晚登甲第出守興州骨鯁忤上官彭澤之腰不折芟荷返初服衡宇之賦遂成扁戶著書茹蔬課子丘園四十載突煙時斷時續而建家廟築墓庭奉奉以木本水

源為先宗族五百人食指如柳如星而脩譜牒揭規條  
諄諄以孝友睦姻為重云 南安邑志 李鹿巢集

閩中理學淵源考卷七十

欽定四庫全書

閩中理學淵源考卷七十一

廣平府知府李清馥撰

文節李九我先生廷機學派

孟子言君子之澤五世而斬後世率以此而論鄉國  
汙隆盛衰之運溯其流風餘澤以究人物終始其大  
致無或爽者明代成化後蔡文莊獨倡宗風隆萬以  
降學術分判遺澤寢微矣文節私淑鄉先生之教以

禮律身以儉範俗其砥礪廉隅猶可以風世也前輩  
嘗言公和氣盎然無復谿刻一切科名勲業之盛澹  
若高禪蕭然數椽中角巾布履不異儒素談及平生  
事自授徒至直閣進退出處之論詳哉其言之余讀  
燕居錄名臣錄家訓諸書仰見典型風節學問源流  
非僅以茹藥見長世有謂公刻而隘者豈為確論耶  
平昔諄諄於薛文清一入其所志所學可想矣余因  
考彼時風尚波靡而吾郡故老尚有典型也故不禁媿

妮述之按公集中與往復相砥勉者有楊氏貫齋文  
恪黃氏九石諸公為後進楷模貫齋二公已另見餘  
附交友中待考焉

文節李九我先生廷機

李廷機字爾張號九我晉江人幼稟氣薄就塾後猶夜  
啼筋浮睛露鄉父老謂非壽相父母亦憂之然沉靜寡  
言永日不思睡十歲從黃默堂先生一日以狀元宰相  
命題破曰名魁天下之選身近天子之光先生喜甚命

同學北面揖之隆慶四年順天鄉薦第一歸讀書永春  
山中再詣公車張居正延教子不赴戊寅移家授經於  
毘陵就館座師申時行者二年萬歷十一年會試第一  
殿試第二人授編脩十四年夏持節封趙藩過家置義  
田贍族人葺先塋葬族人并友人不能葬者累官宮坊  
侍皇太子講學每四鼓入長安門寒暑風雨不輟二十  
四年陞祭酒以整齊嚴肅約士曰此高皇帝之訓今人  
不守高皇帝訓輒遠引敷教在寬之文夫所謂寬者乃

多方勞來輔翼欲其自得之謂豈以縱弛哉陞南京吏部右侍郎署部事二十七年典京察無偏私嘗兼攝戶工二部事綜理精密奏行軫恤行戶四事商困大蘇外城陵垣多所繕葺他如皇城公署廟祠牌坊橋梁一一脩治費皆取節縮公帑奇羨不以煩民或諷以儒臣不宜親俗事曰有俗人無俗事天下國家事何可言俗也時浙人李文政結交近侍廷機告御史寘之法改北禮部左侍郎在禮部時妖書事起捕治甚嚴時歸德沈鯉



四明沈一貫二相不協會有言楚王假王者江夏郭正域為禮部右侍郎所見復與四明相左江夏計四明遂成却江夏引疾去四明之人因借江夏以傾歸德上謂妖書實出江夏手逮訊江夏從人乳媪下多官廷訊五日不決上怒甚詔責會問官有朋友情深君臣義薄之語多官計無所出江夏危甚廷機獨以身保任江夏為之翼護會緹騎緝得礮生光者即以坐之衆在疑信間猶豫未決御史沈裕言於廠璫曰事不決縉紳荼毒矣

廷機是御史言生光亦慨然承伏獄上其事後乃決而  
江夏保無恙署禮部四年立簡易之條以便宗室臧外  
貢入京人數以省邊傳飭殿試之規以閑進士定殿試  
之期以便歲貢肄屋以居官施衲以活凍宗藩有所訴  
請立為明白遂不至賄求胥吏請托中官諸宗德之為  
立生祠四區上雅重廷機三十二年朝覲之期上於禁  
中謂左右曰此時京官不忙惟趙世卿李廷機不與外  
吏相接也褒以忠慎恭勤三十五年以禮部尚書兼東

閣大學士入參機務廷機三辭始受命謝恩疏言人臣  
惟知有主苟可自致於主者無不盡有益於主者無不  
為不知有身不知有家不知有交遊往來不知有毀譽  
得喪必無一念不可與主知必無一事不可對主言以  
是內省有不可則止之訓焉在事九月言者蠶涌遂決  
意求退上屢詔勉留且遣鴻臚卿及同官宣諭趣出堅  
臥不起待命首尾五年乃屏處荒廟廷臣猶有繁言至  
四十年九月疏已百二十餘上乃陞辭出都待命同官

葉向高言廷機已行不可再挽乃加太子太保賜道里費乘傳以行人護歸四十四年卒年七十五贈少保諡文節廷機繫閣籍六年秉政止九月無大過平生遇事有執尤廉潔自授徒至直閣蕭然數椽中角巾布履不異儒素平居言論動稱古人在詞林惟禮節事體咨前輩至行已居官則曰擇善而從可也秀才時館於何憲副元述家何自道居官朝參之勤心志之故仕宦三十年不敢以憚勞養安失禮怠事交游餽餉一切辭却第

以節約當治生曰羔羊之詩誦大夫節儉正直夫惟節儉正直出焉雅慕清淨畫一之理欲朝列之間遵令甲守職掌省議論以奉法循理為先其時士大夫重氣誼尚建白時時軼越所守官而廷機不喜之以此攻之者衆且急卒之清節皦然不可得而誣也自言曰予在政府九閱月惟主張四川撤兵全活黔蜀生靈省饟運俾安疆臣兄弟不至為播州之續此一事差足報國耳所著有四書臆說春秋講章通鑑性理刪宋賢事略編大

明國史國朝名臣言行錄燕居錄文集二十八卷學者  
稱九我先生九我者廷機早失父母取蓼莪之章以自  
號也

明名臣言行錄  
八公撰燕居稿序

明史

新舊郡志

閩書

蔣

### 備考

蔣氏德璟撰燕居錄序曰某少時嘗一再見文節李公  
於家蕭然數椽中角巾布履不異儒素而談平生事自  
授徒至直閣進退出處之詳及議代藩安邊撫酋諸大  
政若以璟為可教者已出燕居錄性理纂家訓家禮授

之最後以宋賢事彙見遺曰此宋前輩事可師法環心  
識之而先君子亦數言公為南少宰時署戶工諸曹勤  
於吏職諸曹郎敬畏之核倉庫繕城工歲省金錢數萬  
計南公卿嘗語公曰公詞林旦晚且相此俗事不足問  
公曰有俗人無俗事天下國家事何言俗也世或疑公  
清而隘及余以諸生見則和氣盎然無復谿刻一切科  
名勲業之盛淡若高禪其署柱間用前輩語曰見故人  
而一笑自有餘歡念平生之百為亦無可恨晏襄幾敝

白頭辭天子歸與陶徑就荒黃菊待主人久矣蓋環一再見而恍然得公之深也比環踵入詞林叨貳春官見公所釐次宗藩條例後人奉若蓍龜所購官房十八座可萬餘金皆節裁部羨蠹為之在辟雍亦各購有官房其意欲使官各有居以養其廉而公家數椽即中人產猶不如也身為廉吏而又能節縮浮費以養人之廉其非徒清可知今諸子貧不能供饘粥而耳視者猶以隘疑之不亦異乎公入直纔數月自擬薛文清嘗抗疏云



臣學瑄足矣及公沒而葉公文忠馳數百里拜墓下省其家無一物歎曰真不愧文清也嗟乎令公而盡其用與文忠相左右當必有不可量者璟既與同鄉刻公集而二雲曾使君復刻公燕居錄以授公子計部百菴君璟與計部兄弟遊見其廉靖有公風因序所受知於公者以見前輩下士之誼而凡讀是錄者時以一通置之座右其於學亦思過半矣

縣令王在雲先生雍

王雍字在雲德化人受業李文節以明經宰浙之雲和  
水蘖著聞調富沙歸田二十餘年為鄉先生正直不阿  
邑有利病輒為別白邑侯亦著蔡奉之甚為時推重置  
義祖以供宗族祭祀

德化邑志

郡守李大堂先生雲階

李雲階字大堂德化人初負篋從王都易學繼師李文  
節萬厯二十五年舉北闈授華容令建劉忠宣大夏祠  
恤黎淳之後各置祀田若干頃剖決冤獄裁抑勢豪無

所回撓歷四薦已署部職竟被多口量遷吉安同知郭  
青螺鄒南皋兩公皆器重之數攝府篆復代榷湖關却  
例金五千餘為窮民償逋賦兩臺交薦以忤當事致仕  
歸家居課讀立社論文指示不倦有書數種藏于家

新郡

志 邑志

通判單巖泉先生輔

單輔字巖泉德化人年少力學從李文節游由恩貢任  
廣東廉州合浦縣清介執法不阿任六年不取合浦一

珠遷通判解綬居鄉家無臧獲妻自炊子自傳茶飯供  
客李文節高之為舉鄉賢邑志

庶子黃九石先生國鼎

黃國鼎字敦柱號九石潛之孫萬厯二十六年進士選  
庶常授編脩使封楚藩毫不受遺會島夷謀互市璫高  
案受賄國鼎移書撫軍逐之李文節病臥荒廟中平昔  
相善之人多引去甚至有排擊自明非黨者國鼎問一  
日一視或再卒以此中蜚語國鼎不致辨上疏求去歷

右春坊右庶子兼侍讀辭歸後六年再召不起卒國鼎  
溫良雅度外若易與中實難犯好人之善不能庇人之  
過喜行善事著有易經初進四書質問

郡佐黃谷谿先生懋中

黃懋中字有及南安人河清之姪萬歷丁丑選貢入成  
均積資出令粵之封川革除舊規遷學廟復學塘魚祖  
歲給師生秩滿擢判瓊念親老不欲渡海移檄歸養未  
幾父訃至服闋補蘇州判掌織造鹽局一切常例毫不


苟取署吳縣釋久繫冤獄三載報政堅意乞休兩臺登  
之薦剡不為少挽歸家鍵戶著書有司至厚者弗干以  
私自號谷谿子初年與蘇紫溪李文節溫晦吾柯立臺  
劉國徵為文字交氣意相勵年九十三卒封川士民祀  
之名宦焉李文節先生序其文徵私志曰黃君有及與  
余為文字交有年辛亥余自內閣賜歸君時過余山莊  
相與談往事嘗欲借國朝實錄觀之予謂君且負良史  
才何不取郡邑志雌黃之以憲今啟後實錄不必觀可

也越數時君書來謂有所脩南安文徵私志蓋邑志久廢姑脩之以備野史以其副投余觀之屬余為序云

南安

邑志

文徵私志序



閩中理學淵源考卷七十一

欽定四庫全書

史部

閩中理學淵源考卷七十二

五

詳校官編修

臣

謝振定

刑部郎中

臣

許兆椿覆勘

總校官原任中允

臣

王燕緒

校對官中書

臣

田尹衡

謄錄監生

臣

沈廷棟



欽定四庫全書

閩中理學淵源考卷七十二

廣平府知府李清馥撰

趙氏家世學派

按吾郡有明以來傳習諸經惟易獨多淨峰張氏嘗  
言彼時蔡虛齋易學盛行于衆詩道幾絕惟朱氏軫  
獨與師友潛心講究由是衆人業詩者多從之春秋  
之學獨推趙氏家學為最著考宗伯文簡每述海內

學士知吾邑有特峰著春秋錄疑與蔡文莊四書易經蒙引並為後學指南可與漢唐儒林相頡頏至尚書尚有數家如林氏鴻儒黃氏光昇蘇氏鼎寶黃氏道煥莊氏奇顯皆著其說至三禮自元丘氏鈞礪之後成絕學矣明初如趙氏瑄有禮經解疑之書厥後楊氏道會有周禮詳節鄭氏維嶽有禮記解李氏如玉有周禮會註亦多散佚莫考竊窺鄉先正敘述經訓每勤懇備書可知彼時崇尚實學有兩漢儒林傳

經遺意蓋欲以一經之士入于繩墨其學術途轍必  
出于一其所以移易耳目開拓心志以造就黨熟之  
士者非無謂也前哲維持學術惓惓如此謹備書之  
遺漏尚多偶舉記憶所及者錄焉

郎中趙惟德先生瑞

趙瑞字惟德晉江人少通春秋不務俗學而得聖人之  
意成化丙午領鄉薦弘治元年進士授戶部主事歷員  
外陞郎中監薊州太倉黃土諸倉壩上御馬諸廐臨清

鈔關皆秉正執法常祿外錙銖不染在官手不釋卷權  
關歸事親盡孝撫寡姊孤姪甚有恩環堵蕭然獨以行  
誼經術遺訓子孫著有春秋管見孫恒

主事趙用甫先生日新

趙日新字用甫恒子隆慶五年進士好讀奇書署其齋  
曰潛所以矯也筮仕分宜令有賢聲中讒改教旌德遷  
國子博士歷戶部主事性介特不屑為阿匿以媚上官  
視貴勢漠如以故仕路沉淪後乞歸終養卒弟日榮

黃文

簡撰墓志

郎中趙因甫先生日崇

趙日崇字因甫恒子萬厯丙子舉人授南康令治民如  
家疾苦纖細皆為區理遷應天司李積年滯牘剖決無  
餘請托不行轉南刑部郎忌者中之謫新城令未幾以  
母老告歸圖書四壁蕭然自樂而贖宗女撫孤甥義行  
尤為鄉里所矜式

新郡志

郡守趙特峰先生恒學派

馥嘗讀鏡山司徒文稱作菴公之景慕先生若趨父兄而奉著蔡而鏡山數過先生問業實亦以師禮事之爾及讀田亭草又知文簡黃公亦私淑之列也觀文簡之言曰某自曩受經時從學士先生訂繹疑義剖析異同必曰特峰趙先生云何即未及門實私淑焉今代遠風微所著曰春秋錄疑者聞郡友人尤氏際坦家有其書其餘亦多散佚即當日門徒亦寥寥莫考謹將文簡并鏡山二先生錄附焉儻後續考有

人再備列之夫前輩流風師表日久寢湮而稽經考傳之事派別益難尋緒矣先生以經學貽謀一時多聞蓄德之士多宗之而文簡鏡山二公尤為隆萬間儒林典則傾心景慕豈僅獻老乞言哉文簡鏡山二公之學另於家世學派敘述此不具論

郡守趙特峰先生恒

趙恒字志正號特峰晉江人祖瑞弘治元年進士歷官皆有清望著春秋管見恒警穎負奇十三充弟子員家

傳春秋學謂胡氏春秋闡素王心法功令標以錄士而  
末學穿求崖穴繁綴枝條如捕風射影奮然以推明經  
術為已任著春秋錄疑讀書武夷山中建州士多就問  
業嘉靖十七年成進士乞就教職得教授袁州督學使  
者延主白鹿洞集諸郡儒乂而師之遷國子監丞尋改  
南都南中辟雍士請所著錄疑梓之居二載遷南戶部  
主事尋進郎中是時承平久四方漕餉率重北而輕南  
歲押運一二縣簿領之所積負以百萬計恒謂留都根



本地瘡庾虛竭何以應猝請之司農陳儒疏部運之規  
令諸省分漕以郡佐總漕以藩司各詣部庭稽覈如輦  
下例疏上得請後遂載令甲恒居部署聲籍甚第以鯁  
介無援遷浙江鹽運司同知未幾擢守姚安姚安俗犷  
淫僻恒為定婚娶之禮土酋歛然又嚴鑄銅之禁居九  
月乞養親歸士民祠之名宦里居杜門寡接邦君式閤  
存訪悉引疾避之交遊中以道義相期許者莫如同安  
洪司寇朝選朝選為權奸所竄逮繫會城獄瀕發訣於

恒曰茲行也吾必死之嵇紹不孤無煩多囑恒呼其仲  
子曰榮命之曰若受洪先生國士知勉旃以報母令魏  
邵郭亮千載笑人曰榮方馳謀索體則虎冠吏已毒斃  
朝選諸親故無得近者曰榮撞突而前殮其尸以歸人  
咸稱曰榮義士實稟前訓也蒞家儼勅雖燕閒必整冠  
危坐對子孫終日無惰容或有軼越譴訶立至諸子孫  
聯翩仕路顧多躓困又皆不屑營私恒每談及津津喜曰  
吾道如是晚歲築精廬於茂趣山中足跡不窺城市車

思著述秉燭讀書其文一以歐陽文忠為宗近述鄉先生王遵巖之遺論醇然先正典型年九十四卒所著有莊子涉筆史記涉筆與春秋錄疑並行于世其忠愛堂稿經濟錄抄及文集若干卷藏于家子日新日崇日崇孫世典世徵世放等俱見科目志

舊郡志  
黃文簡撰  
新郡志  
墓志

### 青陽莊氏家世學派

先文正公撰方塘先生傳曰泉郡之南聳起而特秀者為紫帽山山之下村落繡錯巨宗名人輩出相望

往往為吾郡冠而青陽莊氏尤擅科甲人物之盛非諸族所及也馥按莊之先系出永春桃源自宋少師藻齋公賜第郡城因家焉其姪孫古山復自郡城遷青陽青陽之有莊自古山始傳至方塘十一世矣考方塘先生用賓其後為宮詹際昌羹若氏奇峰先生偁其後為侍郎國楨陽山氏石山先生一俊其後為脩撰履豐梅谷氏餘派系俱未及詳考其家世抑由內行脩潔隱德弗耀累功積厚而致然歟其收名蘊

發于後有以哉今錄其表著者載於篇

太僕莊方塘先生用賓

莊用賓字君采號方塘晉江人生而卓犖聰穎邑先達  
陳紫峰琛聞其名召試庭草交翠論嗟異久之與后峰  
氏壬春石山氏一俊同登嘉靖七年進士第初授行人  
使蜀盡却藩國供餽給事中劉侃當使琉球以母老且  
未子相持泣用賓奮然曰古有以柳易播者何人哉願  
得身代未幾陟司副遷刑部員外郎出為浙江僉事用

賓為人木強又少戇嘗稱士為知己者用當昂首伸眉  
論列天下事奚取局促效轅下駒為每遇權貴人直睨  
之不能利方為圓而於嫉惡尤甚不中意輒面頰怒目  
甚或發憤呵叱之故卒為時所中太宰汪鉉生貴甚嘗  
以事怒其屬長跪不解賓為不平愬之永嘉張相所汪  
適從直房見之恚甚用是出之浙浙所轄寧紹台三郡  
多權貴人一繩以法無敢輒居請者仕中不廢學多記  
覽益精於文藝臨歲比時缺督學用賓署事校寧波郡

揭以袁元峰煒為第一時煒久困未知名即許其文首  
天下已而果如其言餘姚令顧存仁以不阿權貴得謗  
用賓廉知其賢特誇獎之遂得擢黃門以直諫顯視事  
纔八月理冤獄靜譁伍獎拔廉吏所部肅然有屬官倚  
勢貪橫用賓執法治之拂巡鹽御史意疏劾用賓值汪  
脩前憾遂從中覆罷用賓時年方三十一如是家食四  
十餘載絕意仕進宦囊蕭然居鄉一介取予不苟孝親  
睦族行鄉約開水利邑人愛敬鄉評至今重之自嘉靖

三十八年倭寇犯閩中連歲猖獗攻入興化府戕殺民人無數沿海衛所相繼告陷而泉之劇賊黃元爵等因機交煽自郡之内外所在皇皇勢且不保用賓為當事畫策浚城濠部署城中守卒使各為營伍民心遂定城賴以安當倭賊突犯時遠近村民爭入城逃生勢甚急城門晝閉避寇者不得入幾相擁入水中用賓力請當事願身守南門乃操管鑰坐城門外命開門內之而身自當賊所活人以數萬計時賊野掠無所得奸民導之



發塚取贖用賓與其弟用晦募鄉兵後先殺賊多賊大  
恨乃剗用賓父塚刳屍去用賓聞之拊膺號慟與用晦  
徑走賊壘戰於南安雙溪賊大潰連破十三壘負父骸  
歸賊追之用晦殿與其僕鬪死會僉事萬民英指揮歐  
陽深以官兵繼至翼而前又大破賊前後斬倭首百有  
十顆生擒一十四人奪回被擄生口二百七十餘人時  
嘉靖壬戌五月初二也倭寇既潰黃元爵勢窮遂就撫  
泉郡悉平當道屢上其事為冒功者掩抑久之未敘而

用賓終身不自論列萬厯二十二年倭寇朝鮮子鳳章  
乃上言於朝下其事部議贈用賓太僕寺少卿官用晦  
子百戶世襲以風勵天下士蓋去用賓破倭之年且四  
十載矣其後曾孫際昌舉萬厯己未會試第一廷對復  
第一人咸以為用賓開門活人之報際昌天啟中任脩  
撰不附魏閣沉廢數年愍帝立起春坊庶子未幾卒以  
風節故追贈詹事所著有周易解意一編黃文簡為之  
序云

史館擬筆

傅錦泉撰墓志

先文正公撰本傳

莊先生鳳章

莊鳳章晉江青陽人守闕上書言其父僉事方塘用賓  
與其叔父用晦嘉靖中所為禦寇扞城狀晚歲有志斯  
道游李見羅先生之門何鏡山撰莊孝子述

侍郎莊陽山先生國禎

莊國禎字君祉晉江人少奇穎王遵嚴慎中器之妻以  
女舉嘉靖四十一年進士授會稽令出諸生趙日新於  
冤獄贊直指倡行條鞭法以卓異徵拜給事中先後疏

論大臣如郭宗舉游震得遲鳳翔皆夤緣有與援者出  
浙江按察僉事遷江西參議廣西副使復改視江西學  
政累遷廣東按察使轉雲南江西左右布政丁外艱服  
除補河南值兩河大祲白兩臺請發臨德倉改折漕糧  
三歲倣趙閱道荒政選丞倖分地經理之民藉以全活  
甚衆潞邸新開中貴人蒞事所為裁經費汰浮冗無少  
假借事以就緒而民亦不告疲以資望擢副都御史巡  
撫江西先一年水次年大旱復以河南例題請改折計

部初猶難之再疏得請晉南京刑部右侍郎旋改戶部  
以內艱歸國禎器度端凝貌寬和而衷嚴整有屹然不  
可奪者所至守官盡職循級而登不屑借譽養交以營  
速化性坦夷樂道人善非意之加恬然不掛胸臆每謂  
昔人理遣情恕兩言終身誦之可也為文喜典重深厚  
而厭鈎棘為詩喜春容雅渾而薄纖巧大都得遵巖之  
指授為多歲時伏臘率宗之子孫敬共祀事每與人語  
好稱引國家典制往哲節概行誼祖先以來積功累行

之跡旁及今昔人情善敗隆汙之變聽者聳然感動居  
常所過從不過一二故人厚善者當路諸公及門未嘗  
峻拒利病未嘗不以告里黨有負枉不能直者語次間  
為直之然不任受德也卒年七十有八子懋華懋聲見  
科目志 舊郡志 新郡志 黃文簡撰墓志

郎中莊仁山先生士元

莊士元字君聘晉江青陽里人自童年端重不煩父師  
教詔而言動盡有繩檢人稱謂莊家顏回閉戶下帷窮

探玩索庶幾深潛純粹之學嘉靖三十二年試春官編脩胡公杰得其文以白大學士徐公亟加稱賞洎揭榜置名第二時方試館職士元以濡迹權門為恥竟不入選授知廣德州原本經術飾吏而政尚簡靜輕徭省訟吏戢民安尤興學勸禮垂意作人廣德自前守歐陽南野而後州人以士元並稱焉轉比部員外郎己未會試擢入簾所得皆知名士給事吳時來抗章劾嚴相嵩逮治獄士元為問官改擬謫戍當國怒甚持卷四日不下

然畏公議不果駁吳公得棲遲嶺外旋復柄用士元曲  
全之力為多已而轉本部郎中曹銓預有江西督學之  
注會當慮囚士元得命廣東行抵家已有足疾披閱招  
移用是勞勩疾劇卒於高之化州士元寬宏簡默近於  
仁者仁山乃其自號要其質與行誠足當之李氏叔元  
曰敏德為泉南易宗而陳氏琛其傳心高弟蔡于省之  
授莊士元李維徵之授蘇濬皆易學淵源云

清源文獻  
李叔元

青陽五先生傳贊



莊明齋先生龍光

莊龍光字自昭別號明齋用賓家孫甫四歲父沒少負  
穎質九歲能屬文弱冠補弟子員嗣是祖父母及母繼  
沒龍光以嫡冢持服不與棘試者十年時以積毀故遂  
得疾病良已猶理故業沒時年三十有四龍光篤有至  
性內行脩飭母病忘食飲非子手調進不御日侍匕箸  
間間以文事出必歸上食食已復赴日數還往以為常  
母不喜服藥籲天頌禱宛轉進之如是者五年母賴以

坐起比母沒事二叔父甚恭所有遺田悉推與之少時  
師黃文振先生經術之外尤以行誼相慕合遇友人困  
厄銳身救之乏者不待告賑之王生為舞文吏所陷竟  
得直有司而金生妻子恒待以舉火龍光死交友無不  
雪涕者而文振先生與金生各為之服視小功此以知  
其義矣子二夢岳更名際昌重岳史文簡雲臺藏稿

詹事莊羹若先生際昌

莊際昌字景說號羹若曾祖用賓夢張襄惠岳投刺相

謁而際昌生因名夢岳以試更今名九歲善屬文十一而孤萬厯己未會試廷試皆第一衆掄魁天下自宋已未曾樞密從龍而後五百年始克再覩邦人士艷傳之廷對制策一字偏傍偶誤被勘遂乞假歸天啟元年授翰林院脩撰經筵展書起居注纂脩國史編葺六曹章奏乙丑分校禮闈尋管理誥勅時魏璫擅權求為撰祠記拒不應璫銜之視事數日奉使趙藩卻諸餽遺無所納便道抵家丙寅秋當復命會脩三朝要典感然曰是

固欲以國史為刑書者奈何居詞垣受璫指使哉丁卯天下大比士論資當衡文兩京親友勸駕長安中有促之者曰公速來可步武三事也夷猶不赴會部推遷秩為魏璫所擠奪職宗禎初璫誅即家起諭德道陞左庶子至京召對陞侍讀兼記注官時懷宗勵精宵旰五漏入侍率二鼓方罷際昌赴召時途中已得末疾用是困憊卒于邸年五十二上聞心悼降旨莊際昌起廢詞臣効勞卒官贈詹事蓋示優異云際昌胸次坦洞絕不為

矜倨態而性峭直好引掖後進孝友切至傷其弟重岳  
孝廉早卒撫遺孤如已子終身茹素午惟一葷而已為  
文泚筆立就初若不經思索而天動輒隨入仕若干年  
里居強半族經倭難脩譜牒葺祠屋家居肅飭自將蒼  
頭戢戢不敢問戶外事獨好為德于鄉嘗與鄉先輩合  
力築溜石隄門濬新溪水道獨捐費二百金增舊規三  
之二四十二鄉咸利之天啟末海氛不靖鄉人將遠竄  
為立約編伍守望相助瀕海以安焉孫延裕好古鯁亮

有祖風

新郡志  
八閩  
報名記

史文簡撰墓志

閩書

林麟禎補

脩撰莊梅谷先生履豐學派

按吾郡青陽莊氏世多令德代有偉人梅谷先生資  
稟篤厚孝友肫至以文學著稱傳稱其力護趙公用  
賢贈賻洪公朝選其扶持善類誠可風世也再洪公  
一事文簡黃公撰封翁小石公墓志謂公適竣事北  
上與相值頌言出之且周旋襁賁或怵太史是相君  
所甘心也而奈何強預人事封公獨寄聲慰曰兒即

以此得罪無恨老父亦無恨矣即此可想見家學之  
槩餘鏡山先生敘文備詳云

脩撰莊梅谷先生履豐

莊履豐字中熙晉江人祖一俊仕浙江參政有詩才履  
豐萬厯五年進士選庶吉士授翰林編脩轉脩撰尋題  
注起居充經筵官丁外艱卒履豐天性至孝事父望槐  
飲食起居惟恐傷之弟履朋舉進士為郎早夭無嗣當  
其病時度不可起中夜籲天願以身代為人長厚冲抑

見人一善若自己出或聞有過益覆周旋如其自計惟恐失名而喪位其他所先容而汲引者惟恐人知至其邁往之氣有時勃發必奮為義常熟趙檢討用賢抗疏忤時相張居正杖闕下人多避聲迹履豐獨左右之同郡洪司寇朝選為勞堪陷斃獄中適履豐還朝北上屬所善為經紀襁賄乃去才具敏瞻每有撰屬當食篝燈率爾成文不勞草創而雋氣颼舉博達宏濶川湧嶽停世人推服之弟履朋亦有雋聲

雋聲  
集序

雋聲  
何鏡山撰文





閩中理學淵源考卷七十二